

橫  
雲  
山  
人  
集

橫雲山人集卷之十五

雲間王鴻緒儼齋撰

谷口集

感懷

乾坤既萌芽萬物乃鬱蓊循環消長中二氣自相  
踵結魄方西沈白日早東涌情盈潛寓虛機靜默  
函動俯仰觀吾生眇焉一蟣蠓世事迴難齊至理  
何由洞庶幾窮六籍一室晞顏孔

其二

王道日以替風雅遂寂寞東遷綱紀淪憫世春秋

作難窮兩觀誅褒貶寄筆削大義炳天地微言含  
渾噩降及遷固儔元氣恣磅礴蔚宗琢詞藻文勝  
意寢薄間或非是非予奪嗟罕託詩亡史豈亡懷  
古溯寥廓

酬友人暮秋見懷之作次原韻

生涯同泛五湖舟花渚蒲灣幾度秋有夢不驚池  
上鳳忘機偏愛海邊鷗風前蕩槳衝烟縷月下投  
綸漾玉鉤豈學三閭悲見放何須漁父笑中流

其二

九月霜高木葉殘倦飛林鳥息風翰勞歌互荅聊

言志魯酒低斟且辟寒自合蓬蒿棲仲蔚任教冰  
雪臥袁安年來障妄渾消盡祇覺詩書興未闌

其三

參差鍛羽不成行數載閒愁百斛量何意全生藏  
北海那堪思舊賦山陽謂亡友也芳蘭當戶應難立古  
柏凌霜迴得涼兩地相思希會面音書來往藉浮  
航

其四

珠玉吟成處處聞傳來越水更吳雲陶公籬畔嘗  
懷友杜老詩中只愛君綵筆幾時容借潤蓬心已

塞不堪耘吾儕自得清光照何藉東鄰燭影分

座主大司寇徐公偕盛誠齋諸君子會葬相  
國徵賦長句四首

吁嗟梁棟失嶙峋忍見郊原宰樹新東閣何年還  
禮士西州今日共沾巾但知匡鼎推儒者豈意龍  
門屬黨人吳越羣英來會葬素車千兩照江濱

其二

狀頭鼎足際明良曾奉王言播八荒詎有闕遺煩  
補袞愛將章采潤垂裳半生未遂匡時略萬卷空  
存去國裝應卜君恩思太傅他年祠祭有輝光

其三

獨坐烏臺迴莫攀一時殺采著朝班爲爭國是羞  
平署每奏民艱獲霽顏媿媿諫書畱北闕蕭蕭陳  
迹自東山科名昆弟誇無敵能不鴿原涕淚潛

其四

辟雍當日聚羣英駑馬欣逢伯樂鳴窈窕禁林隨  
作史後先飛語共歸耕膺門漫謂逃移牒嵩壁何  
期賸此生回首十年無限事衛公賓舊古今情  
韓慕廬同年舟次見招率爾賦謝

經年相憶夢中尋忽漫維舟並水潯話到青山堪

共隱交成白首自能深多愁憐我頻招飲小戶當  
君不耐斟二十曲江同躍馬幾人無負歲寒心

其二

敬通謝免世情違鳥雀蕭蕭合掩扉吾子正推綸  
誥手清時偏戀薜蘿衣未知出處終誰是祇覺樽  
罍興已非滿目風塵多醉尉扁舟誰禁五湖歸

春日園居雜感

草堂高築瑄湖濱數畝清漪足隱淪案有琴書堪  
獨樂門多鳥雀未全貧幼安坐榻忘寒暑茂世持  
觴自主賓一壑棲遲甘用拙太行千仞漫嶙峋

其二

半生五嶽滯幽情  
谷口閒居且面城  
不礙雲山新閣好  
無妨行坐石坡平  
碧池花墮添魚戲  
修竹風來助鳥鳴  
時有鄰翁過剝啄  
一犁烟雨話春耕

其三

爲愛溪山日幾巡  
浮生休得負良辰  
梅初傲雪猶含凍  
柳漸凝烟已放春  
霄漢高騫無鍛翮  
江湖長逝有恬鱗  
近叅柱史和光旨  
把扇臨風不障塵

其四

休羨欽湖綠野莊  
岼花深處卽滄浪  
溪雲時起縈

窗白隄柳多眠繞逕蒼泉石自娛懷伯翳煙江獨  
釣想嚴光千秋妄擬期同調雅尚前賢未可量

其五

蘭桂何緣縱斧尋頻年削跡廢長吟蓬廬厪納袁  
閑飲蕪室空懷仲舉心飛鳥依人頻聚散浮雲度  
嶺互晴陰細思物態增悲咤敢道孤臣慮患深

其六

春來幽意入林長茶竈香匝與筆牀酒載雲亭多  
好事詩聯石鼎幾撐腸流鶯坐濕相關語嘉樹含  
風不斷香一曲鑑湖年八十挂冠已晚惜知章

其七

一畦春草碧交加，瀟灑真成處士家。  
傍檻遊蜂還繞樹，拂簾嬌燕故穿花。  
水邊把釣移雲影，石上鳴琴到日斜。  
自是枌榆成小圃，子山何事復長嗟。

其八

莫道東陵隱故侯，短牆蓬戶白雲幽。  
三春好聽蛙雙部，萬古誰非貉一丘。  
芳草萋萋疑入夢，名花寂寂似含愁。  
步兵沈醉嵇康嘯，嫉世徒爲禮法仇。

其九

一室臨流畫檻新，博山髹几靜無塵。  
鳴鶯選樹還

求侶乳燕歸巢欲向人入世漫驚三峽險休官偏  
占五湖春閒來喚取鄰翁飲軟語酣歌總是真

其十

年來簪紱換荷衣日日山亭坐翠微身後聲名何  
似酒宦遊京洛豈如歸潛鱗觸餌衝波去倦翮聞  
弦向嶺飛最慕謝安高臥日任人彈奏總忘機

續晉

陽秋云謝安優游山林六七年間彈奏相屬繼以禁錮而晏然不屑也

對酒自嘲

惆悵衰顏那自由杯鐺不識笑何求江花江草常  
畱恨春雨春風最釀愁雅願破除尋白墮倩人高

下辨青州三閭獨醒湘潭上輸與劉伶荷鍤遊

憶兄

燕嶠吳關道路深  
棣華南北幾升沈  
他鄉對月憐孤影  
故國看雲費短吟  
天際斷行鴻雁翮  
沙頭搖尾鶴鴒心  
三年憂患銷肌骨  
衣帶雖存半不禁

其二

夙昔居同洛下誇  
年來庭院幾開花  
遙知巢占新鳩滿  
轉憶堂飛舊燕斜  
庾信種桃空有宅  
仲宣畱井屬誰家  
牛衣賸得殘生在  
屈首茅簷何用嗟

春日書懷

幽懷休與世人知佳景牽情合有詩江芷碧添新  
雨後海棠紅重曉烟時聞聽鳳曲調金雁細蕤蛟  
涎拂鼎螭應笑當年羊杜癖一傷峴首一沈碑

春雨

春雨廉纖幾日晴粉榆社後又清明久諳東作歌  
良耜爲約西鄰事耦耕籬犬花搖三徑吠紙鳶風  
曳一村鳴莫嫌終歲田家苦秧鼓歡呼濁酒傾

夏日村居

五茸城外一山村喬木陰陰長子孫只覺沈冥心  
自逸敢矜湖海氣猶存黃瓊謝政耽高枕李固歸

田矢社門好買鳥犍歌白石躬親耕鑿報 君恩

其二

桑柘濃垂十畝清水邊籬下曉光明誰家負笈童  
趨學到處提筐婦饁耕畦菜散金蝴蝶舞渚蒲抽  
綠桔槔鳴未知歲有何如昔走與村翁計雨晴

其三

滬瀆潮生滿釣磯相隨漁父弄江暉劇憐湘澧空  
憔悴試聽滄浪孰是非舴艋撇波烏鬼健苓簪穿  
荇白鰈肥水光千頃琉璃滑一幅蒲帆月下歸

其四

清和佳景綠陰肥  
畫閣憑風試夾衣  
滿徑梅殘初著子  
一池萍泛欲成圍  
年華老去杯堪斷  
京雒交疎雁亦稀  
遙想射堂相憶日  
半因衰悅念多違

其五

林居灑脫號臞仙  
葵扇輕搖五月天  
洛園競隨髫稚樂  
桃源那與世人傳  
雲松時帶瀟瀟雨  
巖竹頻生漠漠烟  
更有曲欄幽絕處  
隱囊斜倚聽鳴泉

其六

芳湖新納衆流寬  
處處軒牕面碧湍  
小閣檻邊維釣艇  
洞房階下插漁竿  
波搖柳色晴還綠  
潮咽灘

聲夏亦寒間展硬黃窺逸少墨池風雨入毫端

其七

碧潭數頃藕花香翠蓋亭亭拂檻長滴瀝光珠經  
過雨翩躚紅袖倚斜陽輕搖蘭櫂侵羅溼晚坐溪  
風透葛涼自愛湖中成小隱不須絃管醉橫塘

其八

畹蘭花發草堂幽密葉交加翠欲流隱谷泠泠尼  
父操湘江寂寂屈平愁素心入室堪同調跬步寒  
芳自可求祇見當門遭世嫉何如含秀被林丘

其九

朱夏江邨盡日間流鶯滿院不須關門前谷水開  
雙鏡樹裏青峰映九鬟蠟屐半生真是癖敲鍼稚  
子未全頑碧筒吸露堪逃暑坐待滄瀛月一彎

其十

蕭然晞髮對長林避暑柴關少足音赤日迴分三  
島氣蒼龍時作五湖陰堆盤玉藕絲絲雪入饌黃  
魚寸寸金把酒不須河朔飲臨風揮麈獨微吟

買山

小圃柴門盡日關悠然林水自怡顏松牕欹枕依  
清籟蓮艇垂綸趁碧灣芳草有懷春脉脉狂花無

賴雨斑斑此間尚覺禽魚少擬買橫雲一片山

步屨

步屨江頭曉日晴村村景物稱幽情形骸不飾嵇  
中散山水忘歸阮步兵雨濕落紅花意重風飄飛  
絮柳姿輕春光到眼真如駛埃壒休沽後世名

秋懷

商飈瑟瑟動林丘萬里清光耿素秋祇覺登臨無  
故物那逢搖落不深愁芳蘭竟畝靈均佩細雨寒  
江少伯舟安得鋪糟忘獨醒滄浪漁父共長謳

其二

秋氣蕭騷感髣髴絲東皋景物迴含思得逢黃菊休  
相負看到白頭能幾時雀巷華堂棲故燕牛阿高  
塚噪寒鴟榮枯代嬗知何極且把籬邊酒一卮

其三

峯泖晴開玉露天白波丹壁兩蒼然山川覽勝經  
千古草木驚秋又一年浮海不須思范蠡乘槎何  
事羨張騫薄寒中體披簑立愛釣蓴灣縮項鰖

其四

白苧城邊節物涼幽巖仙桂拂雲長經秋不改青  
青色繞徑惟聞脉脉香露裛虬枝交坐幙風飄金

粟點浮觴小山可有劉安伴招隱應栽大雅章

其五

何處騷人最動情小園相荅盡秋聲不禁弱柳當  
窗斷無賴衰荷滿澗平青女忽經愁裏度繁霜偏  
向鏡中生當年搖落桓司馬悽愴江潭淚欲橫

其六

幽燕關塞昔曾遊牢落江湖幾度秋畫角黃雲勞  
遠夢繁砧明月動邊愁

時塞外有兵事

班生投筆心原壯

賈傅談兵志未酬且把山田多種秫藉糟高作醉  
鄉侯

其七

秋序平分對晚天  
三江如練玉輪懸  
清光作伴當三五  
濁酒爲賢有十千  
桐葉影邊棲鳳侶  
桂枝香畔撥鵲絃  
謝莊撫景傷遲暮  
何似青蓮只醉眠

其八

棲遲林下歷星霜  
自覺東籬意味長  
載酒有人還好事  
登高無恙又重陽  
江楓閃閃搖波赤  
巖菊斑斑點徑黃  
豈學杜陵羞短髮  
茱萸醉把但悲傷

其九

日步園林愜物情  
蘿軒高枕夢魂清  
風巖葉落連

朝響秋澗潮來徹夜鳴已喜名山兼舊雨况逢佳  
節更新晴鷦鷯棲穩須無負何羨鯤鵬萬里程

其十

年來削迹隱牆東商氣偏凌感慨中促織有聲淒  
夜月寒蟬無語抱秋風官從忌處應先棄詩到窮  
時尚未工從此力田焚筆硯莫貽書札報山公

冬日雜感

短景羲和北陸行柴關衰颯客心驚辭條密葉吟  
風盡迷浦繁雲翳日生失意馬遷懷楚怨歸田楊  
惲愛秦聲焚魚酌醴安丘壑猶恐人憎百一名

其二

全家小隱傍吳淞投珮田園歷幾冬門引浮鷗來  
遠澈窗懸落木見晴峰桓譚毀重官難進張儉名  
高世不容發興明朝游五嶽雲程訪我更何從

其三

草閣蕭騷昨夜風侵晨旭日上簾櫳寒雲繞戶團  
虛白獨樹當庭殿晚紅舊拓鷲羣臨素練新吟蘭  
操入焦桐幽居自用三冬足文史何妨老敬通

其四

霜深穫稻滿田家眺望平原景物賒數頃凍雲眠

晚犢一村枯木噪寒鴉兒童土鼓爭迎社父老豚蹄祝滿車阮籍東皋陶栗里總憑耕種荅年華

其五

一園花木雪霜殘步屨林邊石徑寬雲岫乍晴人獨往冰潭微合歲將闌含春岼柳偷舒臘向暖江梅迴放寒玉律暗吹天地轉細評涼燠自盤桓

其六

頻年踪跡託畋漁嘯傲嘗耽水竹居門雀一叢賓已散湖蓴千里興誰如孤松半折經霜後涸鮒重甦舉網餘賈誼豈曾仇絳灌只因輕上治安書

其七

書雲此日正登臺江上風光漫舉杯三徑就荒歸  
已晚一陽初至老先來叅軍撫景鳴箏廢工部懷  
人旅雁哀自願死灰吹不起莫勞葭管撥春回

其八

憶昔楓宸賀瑞年陽回緹室曉光懸龍旂高拂南  
郊露雀扇徐開北極烟萬國菁茅丹陛下千行冠  
劍玉螭前氤氲滿想君闡遠愁對滄江釀雪天

其九

惆悵勾吳水早年禾廬魚舍總蕭然朝廷久下

蠲租詔閭左還徵貼婦錢  
淚鶴灘頭無醉客橫雲  
山畔少炊烟何由直指  
巡州郡墨吏聞風解綬懸

其十

守歲茅堂白髮身團圞  
兒女自相親正須絲竹娛  
衰景且列椒平媚早春  
明歲暗增今歲客新符還  
對舊符人送寒迎煖風光  
積願學莊生齒大椿

家園

輕陰淡日養花天佳景  
宜人上巳前寂寂柳間來  
拾翠泠泠巖下引流泉  
溪童蕩槳迎魚樂侍女彈  
箏醒鶴眠幽事十分難  
盡寫滿亭圖畫拂雲烟

幽居

故人書札斷神京老子幽居別有情  
花安四時同庾信草青三徑比元卿  
風前綸墜魚先覺松下琴張鳥不驚  
微物知幾窺動靜何貪丹轂競榮名

科頭

科頭瀟灑度清時蓮沼花畦到處宜  
把盞欲呼林作友放懷何藉雨催詩  
浮萍散綠鳬驚樂細草含香蛺蝶知  
不解東君無限意巧將風物荅棲遲

故人

揮鋤藥圃稱幽情裘馬何知滿帝京  
白雪任教添

鬢色青陽可喜散朝晴柳含金縷鶯雛出草綠銀塘魚子生却笑故人來問訊半多廋語不分明

客至

紅蕖冉冉覆芳塘裙屐翩然到水傍栗里門前容載酒杜陵舍北可傳觴碁翻舊譜消長畫曲度新聲坐晚涼我醉欲眠君未去何妨解榻臥羲皇

對酒

溪亭小酌對霏微紫燕黃鸝滿夕暉北宅林泉供晚興東山絃管試春衣閒來歲月心常逸老至歡娛事漸稀若到潯陽聽法曲可無清淚向人揮

牡丹

彩霞凝露鬪佳辰  
瑤圃粧成富貴春  
曉日施朱偏作態  
晚風偎玉不含顰  
從攜錦繡生花管  
難畫蛾眉傾國人  
一自沈香相對後  
萬年幽怨寄芳塵

橫雲山人集卷之十六

雲間王鴻緒儼齋撰

還朝集

甲戌八月初四日恭聞

恩召還

朝總領史局賦以志感

棲遲峰泖七經秋自分殘年老一丘豈意石渠虛  
汗簡忽傳天語到漁舟鷺鷥洲上朝將別猿鶴  
山中夜欲愁翹首龍門高萬古謗材何以慰旁求  
其二

徵書一幅到柴門急與妻孥話 主恩望古臯夔

行自勉齊名李杜復何論

同時被命者刑部尚書徐公闇學韓慕廬少

詹高澹人宮允徐果亭諸先生

重開

寶翰餘香潤細檢貂衣舊

賜溫從此趣裝先北首爾曹天凍且家園

### 其三

追思飛語入山林羅畢如雲到處尋非荷十行寬  
大詔誰知萬里聖明心餘年無恙天重賜每飯  
銜恩淚滿襟此日陽和來黍谷枯株藹藹碧山岑

### 其四

秋來雲筍築山莊菊有黃華桂有香開得短窗看

嶺翠置成一葉泛波涼濫膺聖主徵偏急翻覺  
幽人夢未長且語園丁栽稚竹他年林密待還鄉  
贈大淵和尚

香刹差峩映綠波生公說法暇相過講壇寂寂松  
風細粥鼓沉沉梵語和半衲數年依白苧一瓶終  
日對青蘿謗書媿我空盈篋願懺前因寫貝多

輓座主徐大司寇

箕尾寒芒映海東百年梁木頓摧風徵書方促蒲  
輪去遺草先悲馬帳空涕淚高文追賈傳烟霞初  
服想興公平生弘獎真無比更有何人識爨桐

其二

憶昔辭榮紫綵溫許攜芸局到江村茂先博物書  
千卷阮籍憂時酒一尊自有聲華貪置驛從無賓  
客怨畱門那知地下修文急曳履偏難上九閭

其三

南北甘陵有是非公歸相與說忘機門前綠水明  
無底郭裏青山世所希止道烟霞供釣艇誰知風  
浪拍漁磯文中弟子多卿相朝野同傷淚滿衣

其四

雞絮粗陳展辨香几筵一哭淚淋浪朝常自被人

言擾士氣都爲黨論傷道喪儒宗嗟太傅世無良  
史痛中郎獨憐漫逐三千履未報深恩鬢已霜

秋夜泛舟邀沈彥徹陳雲高張敦士姪麟照  
小飲

錦帆涇上九秋天無價清光璧月圓兩岸綺疏臨  
水閣一泓燈火泛湖船誰家花下調朱粉何處風  
來競管絃諸子高懷同八達徵書雖迫小畱連

月夜同沈彥徹陳雲高張敦士袁丕文銘旂  
姪麟照登虎丘

名山良夜最相宜況得高朋把酒卮天作廣場堪

共坐人同明月豈無思香飄羅綺真娘墓風送笙  
簧短簿祠自古達賢嘗秉燭祇緣難負是幽期

宋中丞牧仲先生移舟餞別因賦

榮戟秋高霽色開百花洲畔畫船來筵浮綠水晴

移日岸繞丹楓對舉杯今日登龍真似夢

時節鐵與紳士

久絕往還

殘生談虎尚餘哀羨公勁節堅如鐵却有冰

心獨賦梅

其二

節鉞清風滿闔閭脩然鈴下愛琴書柏臺人映冰  
壺月蓮府花同畫舫居咳吐珠璣過大曆平章波

磔到黃初

是日攜鍾太傅墨蹟相示

佇看奏績登槐鼎當有鴻

文贊石渠

### 登惠山

九龍突兀拂蒼穹秋日籃輿上碧空  
雙眼朦朧吳苑外亂山明滅太湖中  
重巖霜老飄紅葉絕頂雲深鎖紺宮  
何自得窮蓮藏義閒揮麈尾伴支公

### 與客談登惠山望太湖之勝

觀圖夙慕九龍名昨始登臨暢客情  
放眼一輪秋日麗盪胸萬頃太湖明  
未知彭蠡能勝此若論勾吳孰與衡  
淼淼波光天樣濶頓將塵慮一時清

遊秦對山前輩山園

扁舟來梁溪誰與話疇昔素心託耆舊爰訪山中  
宅高齋出林杪修檻俯峭壁崇岡互逶迤嵌空太  
古石奇峰或入雲有似巨靈劈堦前涵清波下自  
九龍脊懸崖鑿微竇玉乳生淅瀝不知幾千折涓  
涓竟朝夕泉聲遠近聞動靜隨風激屈曲漲庭坳  
泱泱明几席衆流匯一潭泓然數頃碧升堂揖主  
人肥遁實仙伯旨達老莊妙胸羅丘索僻爲我找  
清尊臨流展良覲坐久頽反照山蒼銜日赤憶昔  
共東觀公才班馬敵謠詠易爲尤含沙有彈射沉

冥十餘載空巖伴愁寂余亦傷窮鳥時時受鋒鏑  
苟非皇天仁那免故事謫今朝重會面一寫幽懷  
積只覺出處殊良負遂初迹徙倚立壑清惆悵郵  
程迫揮手別自茲渺如弱水隔雞鳴倘不渝無吝  
雲中翮

梁溪道中曹峨眉移舟作別詩以贈之

憶昔仕京國鳳沼頻追遊十年互削迹晤覲兩悠  
悠子隱君山麓余棲泖水頭嘯傲煙霞窟不干公  
與侯歎聞徵書至剝啄柴門幽有司疊勸駕堅卧  
那自由舉室盡相笑媿與良朋謀何子不我棄桂

檣搖松舟江沙莽蕭瑟日暮陰雲稠慷慨共握手  
浩氣橫中流子實文章伯落筆矜罕儔睥睨天地  
間杯酒生戈矛腐儒乏與援一擠歸林丘敬通終  
見抵吳質空長愁名高易叢謗休計沉與浮古來  
曠達士舉動忘恩讎吾才固軼世豈終老鋤耰舉  
觴聊屬子且願寬煩憂別後遙相望圭璋勵前修

渡江

丁卯橋邊霽色開大江風物實雄哉山巔睥睨千  
尋出雲際帆檣萬里來吳楚波濤原日夜金焦鐘  
鼓自樓臺揚舠試憶南徐事劉穆當年未易才

望金山

孤峰突兀大江心，親見名山鳳蓋臨。  
山出祥雲迎豹尾，江開明鏡助龍吟。  
鏗鏘宸藻輝星日，璀璨天書冠古今。  
父老謳吟懷聖澤，時巡猶望屬車音。

泊揚州城外

江都自昔競繁華，故國興亡事可嗟。  
廢苑久荒惟斷柳，高臺空在已無花。  
繫舟寥落聞秋角，繞郭蕭疎噪暮鴉。  
二十四橋風雨夜，不堪還問玉鈎斜。

臺已無花矣

瓊花

渡黃河作

重到淮陰已五年揚舲擊汰意蒼然一帆浩蕩黃  
河氣萬里高寒白雁天人雜楚風多古調地殊吳  
苑半荒烟甘羅韓信勲名在應笑書生但簡編

晚宿新興集

長途初日動輪蹄日落西崦借晚棲茅店孤燈千  
里客荒村殘月五更雞自驚髀裏多生肉却爲山  
中久杖藜明發征車衝曉色可無冰雪阻前谿

宿宿遷城外

暫解征鞍傍古城一天風露正淒清孤衾遙聽鳴

砧響深夜惟聞斷雁聲魯酒入脣難博醉勞薪炊  
味不成羹呼童屈指燕山路雲樹猶迷半月程

### 宿紅花埠

南北驅車共幾回曾諳茅店傍林隈青帘招我真  
相識濁酒爲賢有舊醅

余宿此店凡四度矣

行似跳丸朝復

暮客如征雁去還來無邊旅況添詩思難竝休文

關綺才

同行者有沈子

### 馬陵山道中口占

七國孫龐事猶畱戰伐名那知侵魏後終是被秦  
并大樹今何在寒山空自橫時清消壁壘曠野盡

深耕

考孫龐馬陵在大名城東舊志淮北馬陵山亦載孫龐事

宿李家莊

漠漠青齊道蕭蕭旅館清  
關山多朔氣鞍馬尚孤征  
已動懷鄉思況當寒月明  
夜長喧櫪馬歸夢亦難成

沂州道中早行

曉色來青嶂行裝趁客羣  
吟鞭搖落月驅馬入寒雲  
遠近車鈴應高低野燒分  
儒生誇道路羽箭似能軍

渡沂水

吾愛沂川水泓然見底清涓涓流不息浩浩去無  
聲色借銀河濶沙同白雪明暮春如過此洗沐有  
餘情

宿豐城旅店州牧馬君餉酒饌至

沂川城堞古雄州牧伯盤飧慰客遊肥羜一人兼  
兩膳香醪三斗破千愁疎櫺烘日冬還煖野店看  
山晚更幽且憩征鞍開竹笈閒窮經史助觥籌

馬上

策馬清晨動短吟巖行高下倍崎嶇長途風露人  
憎早冬月關山日易沉只擬漁竿耽寂寂誰知征

轡走駸駸七年患難讒銷骨感激 君恩涕淚深

由青駢寺至山店宿

自我入青齊驅車莽林麓萬山互鬱律無處得平  
陸高下歷嶽崎登陟閼谿谷時或凌絕頂惴惴如  
集木聳身畏峻坂老馬亦局縮俯視山下村入烟  
裊空曲日斜至寺門盤飧雜麋鹿道旁見古寺鬼  
神何黠黠頽垣苔蘚青空堦老檜禿孔蓋與翠旌  
剝落多傾覆侍卒頗崛強張目怒猶蓄時代杳莫  
稽那免茂草鞠佇立聊嗟吁不覺滯行軸世事本  
迤邐吾生苦拘束茅店且一眠能無中夜蹴明朝

拂征鞍崖乖路彌跼孟門乏完輪羊腸難側足牢  
落乾坤中奚由返初服

驛路

石磴參差驛路通疎林不盡書濛濛鳥飛細兩孤  
烟外人繞蒼山翠嶺中時見草間騰玉兔戲於馬  
上挽雕弓雖慚手腕全無力緩帶輕裘意味同

蒙陰道中

納納長途得半間詩書不廢且間關車中忘倦因  
耽句馬上多情爲看山古碣占岡書刻畫寒泉橫  
道響潺湲竭來世路多紆曲歷盡羊腸任老頑

至蒙陰銀臺李德中移酌旅店

蒙陰城郭壓嶙峋，霽日千山翠色新。  
正欲歇鞍沽美酒，何緣挈榼展華茵。  
松筠勁節風霜久，金石深情笑語真。  
須念蒼生無久臥，待君獻納對麒麟。

宿羊流店

我到羊公里，追思舊德清。  
平吳曾決策，饋陸有深情。  
樹記探環異，碑傳墮淚名。  
何須悲峴首，青史載芳聲。

羊流店遇靖逆侯張又南自閩入覲

徂徠山下歇行裝，恰值元戎謁建章。  
家襲躬桓雄

博望帳傳經籍邁當陽魚畱昔奉相思句虎節今  
瞻滿路光男子勲名須萬里久宣威德到扶桑

其二

五等分茅屬象賢高門勲業舊凌烟初瞻廷尉持  
平日又見畱侯借箸年繾綣驛亭憐舊雨參差征  
騎話朝天只今聖主殷西顧韜畧先須奠九邊  
曉發羊流店

暮宿荒村聽斷鴻曉驅行李入空濛徂徠北繞千  
林合太嶽中盤萬嶺雄天作凍雲方釀雪馬思霜  
草半嘶風人生出處緣何事得失應須付塞翁

宿泰安

石徑山橋悵落暉奉高城外息征騑雲光繞戶寒  
侵眼嶽色當庭翠滿衣驛館盤飧誰作主孤尊僮  
僕自相依思家欲寄平安語天濶風高旅雁稀

曉雨發泰安

驛館通宵旅夢殘茅簷滴瀝似風湍凍雲欲壓孤  
城曉細雨斜分泰嶽寒馬濕障泥愁不渡車行獨  
漉勢尤難何人詞奏通明殿乞散重陰共劇乾

界首旅店見亡友周鷹垂壁間詩句有感

壁間誰寫白雲篇故友題名尚宛然追憶竹林豪

態絕那堪重到酒壚邊

其二

小小看君擊鉢時  
江花五色絢烏絲  
如今匣裏多零落  
腸斷還吟壁上詩

自界首抵張夏

疎雨含林點客衣  
千巖疊翠轉霏微  
倦行馬首將何託  
投止山村也當歸  
圭竇土塗風易入  
松膠瓷滲味全非  
却輸吳下簾華子  
香閣紅爐錦障圍

雪後曉發張夏道中

路出青齊曉雪晴  
登山渾似玉山行  
參差石磴光

相照高下霜林畫不成有賦欲裁梁苑簡無能夜  
入蔡州城半生勲業真何在遠愧袁安獨臥情

由張夏歷山路至杜家橋

連峰數百里迴合參碧落懸崖或千仞聳若干將  
削上含無盡雲下臨不測壑未知造化功還是太  
古鑿策馬登礧礧無異踐鋒鏑細磴相縈紆迴欲  
穿冥漠俯身視平地彈丸眇城郭萬一遭泛駕蹉  
跌將安託歟段伏波違腰帶隱侯弱徒抱江海心  
歷茲道路惡始覺天地間夷險互參錯不覩齊嶂  
雄曷徵吳岫薄吾思山川險分野關維絡所由良

素定隨命自棲泊崎嶇固閱盡豁然悟寥廓

至杜家橋

山路已盡矣

### 杜家廟北發

茅簷糝玉已通宵午後猶看雪意驕客裏山川愁  
漠漠天涯風霧莽蕭蕭銜書聲斷誰家雁荷擔烟  
歸何處樵泥沒錦韉難復進前村準擬駐征鑣

### 齊河曉發縣尹李芳嶮出送

雞唱嚴城曉漏移驛亭簫鼓動寒颼青山遶郭橋  
邊路花尹班荆月下時宿雁見人翻雪渚驕驄向  
客嚙霜枝我來落拓揚雄戟待爾飛鳬上玉墀

禹城道中

崎嶇山路已經旬乍入平原尚苦辛  
雪徑繞村猶帶月霜顏得酒暫生春  
逐麀聯騎翩翩客摩頂焚香續續人

見進香泰安者甚多

風景不堪鄉國異征衫將破染緇塵

其二

謾說人間行路難三旬水宿與風餐  
少時無筆誇磨盾老去何能學據鞍  
敝篋犢禪難借煖荒村姑惡正號寒  
計程月杪棲京邸兄弟團圓話夜闌

過平原飲董默菴前輩宅

疲茶萬山間路險天地窄昨朝出岷谷豁達平原  
陌有使前致辭邀我話疇昔策馬入城闌爰訪晏  
相宅公聞足音喜早已途中逆升堂拜未畢樽俎  
羅几席雖感故情深母乃不速客却念十載餘雲  
山兩睽隔今晨快把臂敢辭露肝鬲憶昔鈞黨興  
何處無彈射我公天人姿迅舉凌風翮鯁生愧燕  
雀翻飛不盈尺幾遭一網盡那復逃椅撫時公秉  
斧鉞察余戶掃迹朗朗明月輝迴照尋山屐嗟哉  
彼譖人陰凝毒霧積仰荷皇天鑒 渙汗別黑白  
撫躬增內省感激彌跼踖欲酬悵懔德踵頂難塞

賁九章發楚哀三宥蒙 堯澤吾儕幸無恙此豈  
由人畫繫惟 至聖仁始得收魂魄於公本同患  
所以相剖析當筵聊一歌往事等駒隙共倒杯中  
物轉爲別離惜

平原懷古

濁世翩翩公子名平原采邑尚巖城身驅鐵甲摧  
秦壘血濺銅盤定楚盟有美不妨酬覽者滿堂初  
未識毛生從來結客知誰是珠履三千空復情

宿黃河涯

疏鑿懷明德相傳馬頰河按圖尋故道何處覓洪

汜地濶炊烟少沙暄野牧多揚塵誠不妄東海近  
如何

過德州友人設席旅次

德州城外響流澌旅館殷勤有舊知風雨每懷鴻  
斷候松筠不改歲寒時多君冒雪遙相欸問我衝  
泥何所之此去廣川三十里仲舒臺畔且棲遲  
州宿景

客思

驛館蕭條旅思濃孤城欹枕聽疎鐘客行雨雪將  
千里家隔雲山已萬重脆管清歌懷白苧畫船明

月夢吳淞不堪別後魚鴻斷錦字迢迢尚未逢

景州

州中有塔  
高十二層

齊魯謳吟歲有成此邦風物倍昇平市中酒可家  
家醉原上田從處處耕柳色繞村消舊壘堦鈴穿  
漢響孤城膠西三策堪王佐偶忤孫弘負一生

相傳

漢時細柳營在  
此又仲舒故里

平疇霽雪

雪霽川原萬頃平銀河瓊海浩無聲寒光直與天  
相照積素渾將月共明若擬撒鹽堪比白任教飛  
絮却嫌輕水晶宮裏冰壺色屑作人間玉樣清

宿交河旅店

黃塵雪壓晚風輕又到交河浣客纓  
棗徑柴籬何灑落紙窗茅屋亦虛明  
蒸豚細割銅盤膩芽菜新嘗玉齒清  
謾道盡除南氣習北音聽去語還生

阜城驛道中

喔喔寒雞四野鳴征途纔上已天明  
趨朝才愧輸班掾作客情先倦長卿車  
過屠門呼大嚼北地市酒食者  
輒呼以馬臨峻坂叱徐行謾言人自長  
安近尚有輪蹄數日程

其二

遊子間關意若何天寒道遠倍蹉跎  
早知瀛海清霜重自古滹沱白雪多  
馬向北風神爽健雁投南國語雖和  
遙思此際高詹事可有瑤華屬和歌

旅店

雪滿高城月滿樓花驄還傍酒家留  
黃爐不減狂奴態畫角能添旅夜愁  
懷友一行憑塞雁防身千里仗吳鉤  
步檐直欲窺銀漢不覺霜凝鶴氅裘

蠲租

民寬租復盡熙然況屬昇平大有年  
戶足新絲何用賣家無舊責任高眠  
卿雲處處輝堯壤瑞雪霏

霏滿舜田願祝 聖人千萬壽如山如日又如川  
日暮任丘令泥畱李家園宿

客路迢迢縱復橫城邊官騎遠相迎競言西嶺紅  
輪墮且對名園白雪明漠漠虞丘寒樹色蕭蕭易  
水斷鴻聲欲尋燕趙悲歌士把酒臨風憶慶卿

過雄縣

雄州城外水涵天古樹衰楊夾岸邊馬過欲嘶千  
頃碧人來橫破一湖烟誰家雲際飄漁艇幾箇沙  
頭立鷺拳此地若還聽擊筑漸離悲怨古今憐

抵白溝河

路出雄州北川原縱目多寒林清苑驛明月白溝  
河過客油軒載行裝細馬駝憑高尋戰壘遼宋幾  
橫戈

白溝河爲遼宋分界

其二

自入幽燕路崎嶇半月程短轅冰上轉疲馬雪中  
行結隊聽晨鼓投村到晚更頽然茅屋下樽酒慰  
平生

過新城

袞袞風塵際遙遙上國遊自違林水趣不覺歲時  
道野曠鳥號冷天寒雪作愁十千須美酒應典鷄

鵲裘

天涯

誰是勞生者天涯作宦人  
世情隨鳥雀吾道日荆榛  
驢背髭黏雪風前面障塵  
算來清絕處還是五湖綸

過涿州懷古

涿鹿雲寒白日陰城頭畫角氣蕭森  
地開督亢川原壯樹繞華陽雨雪深  
天設重關雄左輔客來疋馬動高吟  
燕丹報憤良無策節俠淋漓自古今

其二

昭烈鍾靈范水濱  
童童車蓋擁青雲  
自當帝業歸王冑  
謾道英雄與使君  
得雨蛟龍騰半壁  
造廬魚水定三分  
我來欲吊樓桑里  
立馬荒郊日已曛

旅次友人作別赴幕

旌旄千騎古諸侯  
鈴下青油擁道周  
正是翟公賓客減  
始知王粲合依劉

盧溝橋

桑乾橋下波濤黃  
桑乾橋上行人忙  
不知羈旅各何意  
南轅殊未央  
吾生分老滄江曲  
詔下續食趨天闕  
今日登橋南一望  
京華乍到已思鄉

將至都友人攜榼旅次即事

驅車朝上天京門故人道左攜盤飧風塵瀕洞久  
乖隔握手一笑蒼顏溫亟問鄉國景何似東南民  
力難爲論即如邇年苦河決洪濤日打淮城根雷  
轟霆擊搖地軸清口全被黃流渾金堤一線眇如  
髮巨浪嚙土遭崩奔捷竹不聞塞延世宿堤那復  
畱王尊哀哉羣黎遘昏墊夢寐未醒爲魚鼃至今  
廬舍猶水底樹杪慘淡含沙痕浩浩雲波與天永  
沸鬱何處尋烟村鴻飛中澤寡安堵蛙鳴沉窰愁  
饑魂瘡痍未起復召役里正火急驚朝昏長菱蹇

盡薪不屬萬指畚鍤同黥髡還搜老弱徵催直家  
無土銼身無禪 朝廷大沛蠲租詔鳩形重活由  
天恩嗚呼江淮輓漕關國計一歲不給將安存伏  
聞 至尊切咨儉灑澹日欲聆昌言因君蒿目陳  
梗槩繪圖莫克排重閹何年 車駕築瓠子沉馬  
投壁刊淇園淮水自清河自濁合流歸海順星源

橫雲山人集卷之十六

橫雲山人集卷之十七

雲間王鴻緒儼齋撰

還朝集

乙亥元旦早朝恭紀

獻節嵩呼萬國歡  
袞龍光耀五雲端  
笙璫高下鳴

丹陛羽仗東西映  
玉闌荒服來王新  
曆日

塞外各部  
落俱

奉正朔

藩邦奉賁舊衣冠

朝鮮用本國衣冠

巍巍

聖德真

無外賈誼何煩策治安

元日朝回漫賦

元正七載隔明光  
何意重陪鵷鷺行  
鯉夢乍回身

傍日豸冠無恙鬢經霜朝儀再習增春暖野趣猶  
存諳世涼願學子雲常寂莫閉門濡筆賦長楊

上辛祈穀午門候 駕次仲氏原韻

鐘鳴絳闕集仙官鵠候鑾輿漏未闌鳳管鏘鏘開  
輦路龍旂肅肅賁 郊壇爲憐部屋祈年切不憚  
天衣點雪寒躬際昌明無寸補漫從芸局混鵷鸞

入日

帝里韶年淑氣新萸階七葉動良辰樽前剪勝人  
爲日客裏思梅雪作春繡柱銀鐙懸綺戶翠蛾朱  
轂暗香塵風光到眼須行樂金馬門前物外身

上元前四日宛平相國招飲怡園恭賦四律  
四始春王月三槐宰相家條風方轉律東閣已含  
花賓客鏘珠履笙歌沸絳紗多公調燮暇問字許  
侯芭

其二

綺讌宜晴日嬌歌向晚風春調金鉉裏情滿玉壺  
中元老推蕭相蒼生倚謝公榮名兼厚澤青史幾  
人同

其三

改席遊金谷攀巖看火城銀花千樹合蓮炬百枝

明雕榭喧鼙鼓高臺咽鳳笙惟公能後樂常捧泰階平

其四

疇昔違函丈田園臥七春那知開祕府重許謁平津  
裴令莊堪賞曹侯酒自醇歡情畱午夜珍重護車茵

元夜

今夜皇州月春風第一場金吾弛禁鑰繡閣出紅粧  
火樹家家豔蓮燈處處光那知宦遊者對景暗思鄉

十六夜飲伯氏寓齋

良夜歡娛棣萼同香浮綺席畫堂東銀燈不讓冰  
壺色璧月如搖玉盞空佳節每逢頭漸白笙歌何  
意袖偎紅追思少小爭搏蠟五十餘年似夢中

題高澹人北墅梓花圖

北墅繁花足畫圖更推文梓秀當湖嬌紅十樹渾  
成幄除却君家天下無

其二

名花稀見勝優曇宮尹風流性所耽自到禁林頻  
倚望倩題紅雨話江南

壽京江相國母何太夫人八十

晉國崇封迴莫倫三山京口鬱嶙峋黃扉元老鴻  
釣日絳幔慈親燕喜辰婺彩鎮臨南極賁袞衣長  
映北堂新庭闡色笑溫如霽丹地和風萬寓春

其二

三何門閥擅南邦簾閣調琴佐曲江開代元音推  
第一傳家八柱美無雙仙鸞遙下黃金詰御酒  
封來白玉缸憶昔六龍親教授九熊燈火燦秋牕

其三

花前二季日承歡北闕思親疊問安緘到琅函皆

琬琰棲來寶樹總鵷鸞稔傳懿訓鍾兼郝坐策殊  
勲富與韓興慶若教朝 壽母班行應冠五雲端

其四

蓬瀛復覩挺孫枝華貴門風黼座知奕葉鵷班看  
接武再聯龍榜緬當時禮闈八秩欽人瑞庭列三  
台重母師房杜同遊良自愧年年長願宴瑤池

四月初四日恭詣

暢春苑請

安蒙

聖恩賜茶饌恭紀

蘊苑逼瑤天離宮萬嶺懸我

皇來駐輦侍從總登仙花柳明金闥鵝鸞拂綺筵  
朗然蓬島勝都在紫微前

其二

寶鼎分丹地瓊漿出

帝閭茵鋪金狄下七設玉螭旁萬樹露杯綠千花  
雜饌香漢庭誇割肉應讓此

恩光

六月二十五日恭蒙

聖恩召戶部尚書臣廷敬少詹事臣士奇同臣鴻

恩而出隆遇曠典前古希覲恭紀

曉日曛曛謁苑門垂楊深處頌  
皇恩忽傳聯珮游瓊島重荷調蘭列鼎飡花覆錦茵搖水榭鶯  
窺珠宸語風軒嘗羹不覺移磚影坐愛層霄萬景  
暄

其二

中涓引上木蘭舟御苑風光結伴遊  
兩岸柳垂青嶂密一川花泛碧泉幽  
雲開似入桃源徑棹轉猶迷杜若洲  
應勝乘槎浮漢渚更瞻天仗列蓬立

其三

瑤齋高瞰玉河平百頃波光似鏡明西嶺翠微連  
檻合東瀛雲氣拂簾生何須牛女畱銀漢謾說風  
雷動石鯨聖主臨淵惟鑒古泠泠山水舜琴清

其四

瓊軒髻几更張筵晴對芳湖玩綺蓮香扇堯厨蒲  
簑日榮浮漢燕柏梁年細斟嫩碧松醪美分擘輕  
紅荔子鮮飽飫嘉珍歌既醉渾忘身在五雲邊時福  
建鮮荔新到命  
各分嘗並許攜歸

其五

淵穆宸襟契太虛翛然塵外水雲居經營靈囿

勤民暇歌詠卷阿聽政餘案上綠沉三代物牀頭  
黃素六朝書回翔閭苑真何幸枚馬雄才愧不如

其六

向陽 黼座對烟嵐座後軒亭碧樹龕滿院藤陰  
炎暑散一簾香霧午風含嘉禽雪羽來天外珍果  
丹葩自日南學士總饒花鳥興上林奇種未曾諳

其七

機務清閒翰墨研牙籤玉軸滿瑤編蓬萊山作藏  
書館太液池爲洗硯川八體縱橫參造化六文揮  
灑入雲烟因知 睿筆超神聖曾寫鸞龍九萬箋

其八

捧閱奎章到日斜更從浦漈挹明霞蓮房細展  
千重瓣水殿分頒五色花翠管摘來同嶽井銀罌  
擎賜出天家聖朝異數何優渥畱作瀛洲盛事  
誇

七月十一日恭詣

暢春苑進呈董其昌字蹟蒙

聖恩復

賜御書臨米芾跋手卷一寵賚渚加天章世寶不  
勝榮幸恭紀七言絕句四首

蓬萊別館徧芳暉  
名蹟親呈到翠微  
天語迴傳  
霄漢上仙雲  
晴滿侍臣衣

其二

千層翠嶺繞離宮  
御幄香飄碧樹風  
特啟書奩  
頒寶翰  
彩鸞飛下曉光中

其三

懸針倒薤墨濤香  
絹織鸞溪白雪光  
陛下法書  
真第一  
何須人道米襄陽

其四

數載含毫玉殿前五承  
溫綈賜瓊箋  
捧回什襲

欽定四庫全書  
蘇軾詩集卷之二十一  
九  
縑緗秘寶氣珠光射九天

送閣學陸義山致政歸里

昔瞻瑤札到漁磯  
今送朱軒出帝畿  
青史同心憐鳳去  
碧雲無際羨鴻飛  
忍將天上絲綸手  
甘製山中薜荔衣  
主眷方隆堅致政  
如君勇退古人稀

其二

鴛鴦湖畔柳垂烟  
峯泖晴光入望連  
君到尊鄉成獨隱  
我來芸局竟何年  
月支囊粟愁爲客  
冠掛金門意欲仙  
應笑風流推賀監  
白頭八十始歸田

送學士史胄司扈

駕巡幸口外

秋爽時巡出建章  
儒臣扈蹕有輝光  
含毫執簡鸞輿側  
緩鞚垂鞭豹尾行  
七校旌旗搖塞柳  
千言珠玉賦長楊  
遙知才子承恩渥  
不數相如侍漢皇

秋夜旅懷

高館青燈獨夜吟  
商飈遙動故園心  
孤雲影裏三秋雁  
明月光中萬里砧  
客勒銘文山鶴怨  
官慵汗簡蠹魚深  
虛依槐棘星霜換  
辜負橫巖桂樹林

其二

一生判就紫微臣出處天教翰墨親豈學王融常  
恃地何嗟汲黯後來新聞斟綠醪爲知己夜對青  
藜似故人却掃著書成大隱門前車馬自揚塵

書齋

棲遲何異隱牆東羅雀人情悟翟公閉戶著書秋  
漸晚滿庭黃葉下西風

九日攜榼偕錢子亮工維在叔伯氏仲氏扶  
升姪煒兒登崇效寺佛閣

鳳城九日曉光開聯騎尋遊鹿苑來繞徑清涼舍  
古柏諸天蒼翠落高槐摩獅梵唄聞香室戲馬秋

風憶古臺莫學杜陵羞短髮茱萸醉把漫生哀

其二

紺宮高閣俯晴空萬里秋光眺望同幾處孤烟生  
遠岫一行新雁度長風西山蜿蜒霜林外北闕嵯  
峨夕照中經歲殘編徒屈首且從籬畔醉陶公

其三

軟紅塵裏閱年華那得登臨逸興賒聊飭行廚攜  
綠酒莫逢佳節負黃花客同鳳嶺皆堪醉帽到龍  
山却易斜座上湘靈才最綺題糕詩就爛成霞

其四

東籬客歲菊花班笑插盈頭醉更攀強起一行拋  
栗里空攜數口滯燕關愁中節物忘寒暑夢裏家  
園自往還早計殺青藏柱下告歸峰泖弄烟鬟

訂萬季野王崑繩錢亮工諸子同遊西山

離索年來寡勝遊高朋今日快清秋那堪白髮催  
塵事且向青山浣旅愁楓葉叢中傾綠酒雲峰高  
處倚紅樓好攜謝朓驚人句吹笛臨風互唱酬

其二

朝朝城上碧山痕西爽遙今逸思存長嘯待君尋  
鳳嶺青鞋從此覓雲門溪泉瀉玉分千澗巖柿垂

珠映幾村回憶舊遊經十載翠微巖下倒清尊

馬上望西山

人生幾得九秋閒駿馬輕裘去看山萬仞蒼然真可愛白雲紅樹點烟鬟

摩訶菴

寺古蒼松深幽然蓄清冷虬枝蔽白日滿庭散疎影謾謾生涼風不覺塵慮屏即此靜者機禪心可與永況遇支道林微言發深省徘徊過虎谿秋光遍西嶺

香山

何處秋偏好香山第一峰層霄多紺宇數里是雲  
松徑曲樵聲蒼巒迴翠靄重徘徊忘出處亭午正  
聞鐘

其二

紺殿凌青壁丹梯鐵鎖懸憑欄低日月揮手接雲  
烟殘碣已難讀喬松不記年身心何住著趺坐且  
逃禪

其三

軒檻居幽勝來青最得名俯臨平楚闊斜挹數峰  
青星漢輝宸翰雲霞接帝京冷然憑御遠何

處起秋聲

其四

僧話金源日前峰指祭星山光猶風昔人事已凋  
零幽鳥吟紅樹晴雲戀翠屏壁間存秀句可被管

絃聽

壁間有王文貞公詩句

臥佛寺

之子來西域津梁亦已疲空山堪獨臥欹枕更何  
思水月常虛夜松風無盡時可能棲寂滅岩下結  
荆籬

退翁亭

退翁亭鎖白雲間  
遶砌流泉碧玉灣  
秋草已荒裴相墅  
遊人猶說謝公山  
松枝灑綠叅天古  
柿葉殷紅點地斑  
名勝從來誰是主  
敬湖黃汧久禪關

碧雲寺

碧雲香剎倚天開  
芒屨重陽結伴來  
曲曲流泉鳴澗壑  
層層紅樹映樓臺  
秋光麗勝春三月  
良友醇逾酒一杯  
臨水登山殊不惡  
何須宋玉漫悲哀

其二

歸隱何時輞口莊  
得逢山水且徜徉  
頻年客爲緇塵老  
特地身來佛院涼  
碧沼游魚紅可數  
霜巖生

菽綠堪當日斜解榻僧窗下不覺松風入夢長

其三

勝國貂璫墓道長墓前樓殿似明光儘教玉匣偷  
中禁巧借珠林壯北邙布地金錢誇白望拂雲螭  
碣擅王章可憐恭定稱天子園寢蕭蕭蔓草荒

康定明景  
皇帝謚

其四

碧泉龍竇響岩亭旋繞堦除韻可聽客至鬚眉侵  
澗綠坐來衣袂惹山青十圍文杏交成幄百丈霜  
崖翠作屏對景劇談思故里小園鳴瀨亦泠泠

度嶺至清涼寺

即秘魔崖

朝策紫駟更訪名山勝循山越數里石古紫細  
徑細徑盤空幾千折懸崖屹立垂雲磴我馬努力  
如挽強得得霜蹄山谷應巖深樹密不見人縹緲  
忽墮雲中磬聞聲更上最高處手向青天拂烟霧  
北瞻萬仞紫荆之雄關南見匹練桑乾之古渡朱  
霞空翠顯復滅塞雁邊鴻鳴且度有時耳畔響笙  
竽紅雨隨風紛滿路路轉山腰過石梁錦湍白石  
聲迴翔攀林躡嶺指絕境特來古寺尋清涼清涼  
寺額明季興廬師卓錫隋時僧尸陀林下築龕宇

大小童子依禪燈一朝委身清潭底雷雨忽覩蒼  
龍騰至今潭水深不測得無猶有精靈憑又傳師  
從江南來棹舟而止此崖畔崖如崩雲勢欲落却  
坐其間自昏旦千秋遺像風露中迦葉阿難尚瓘  
璨相傳天寶遺製我來荒徑杳無人惟見松雲相舞亂何  
必若耶之溪文杏館願隱茲山弄柔翰

盧師祠

盧師祠下桑乾口垂拱年中患急湍今日盧師亭

上望淡煙喬木隔桑乾

桑乾已南徒數十里矣

望寶珠洞

崖畔秋光劇可憐  
寶珠遙望更悠然  
隔谿红柿晴疑燒  
徧嶺青松翠作煙  
樹杪數行穿獵騎  
雲中百道下飛泉  
便應散髮棲岩洞  
一曲狂歌任醉眠

板橋

石徑山下

桑乾之水出雲中  
石徑山摧濁浪雄  
一線板橋橫兩岬  
似經秦棧入蠶叢

戒壇

獅子巖頭十八轉  
兩岬相峙路如線  
青巒碧澗繞珠林  
丹壁雕闌聳禪院  
峩峩蒼松寒連柯  
接葉捎雲端蹁跹有  
似翠蛾舞天矯時  
作蛟龍盤立

者倚者各有態或疎或密何珊珊黛色參天凌漢  
柏濃枝避雨勝秦官我來婆娑至日暮耳邊蕭颯  
流青湍不知植根幾千載霜皮百尺雄齋壇憶昔  
少遊慈仁寺殿角雙松交古翠童童如蓋映芳樽  
未飲先教心已醉可惜花宮作賈廬枯株零落充  
炊烟豈若茲松踞塵外丰神烏奕層崖巔乃知市  
朝摧折易衰朽山林岑寂多長年嗚呼山林岑寂  
多長年北窗我欲耽高眠

宿戒壇

朝從翠嶺遊暮向花龕宿秋山多白雲英英媚幽

獨

其二

盤空石磴高策杖逢僧語云何極樂峰更指雲深處

其三

禪關清且幽一燈燦書幌相對秋山中磬聲雜松響

其四

不知雲徑險策馬上青霄更欲窮幽勝來朝問采樵

霧中由戒壇度羅睺嶺稍霽至潭柘

既瞻戒壇松言觀潭柘樹山僧勸我且莫行白額  
秋來亂林塢我聞斯言大呼怪欲行不行日亭午  
此生到處被物厄不信山遊復有虎攜朋大笑出  
寺門樵子前驅荷干櫓聯鑣兀兀雲霧中羊腸鳥  
道愁花驄十步九折凌絕壁仰面直欲摩蒼穹但  
覺千山萬嶺同一氣舉世高下歸鴻濛我僕馬蹇  
滯巖底招呼不辨西與東茲山猛獸固安在耳邊  
作吼惟松風須臾度嶺四天豁西崦已墮銅輪紅  
忽見九峯開錦帳朱霞一抹青芙蓉紅樓金殿聳

天際秋林杳靄聞清鐘我策我馬入幽谷  
蕊蕩相引巖之麓紺宇輝煌繞玉闌禪房窈窕  
搖修竹古柘千章無復存妙巖雙趾今誰續  
日斜不及訪龍泉仰觀峰頭亂紅綠對景行  
廚瀉酒醅臨風萬里酣高臺我且歌君莫哀  
元規朝市多塵埃城外名山誰看來

度盧溝橋

秋風匹馬度盧溝鐵鎖關門俯濁流試上玉虹聊  
極目蒼烟寒日古幽州

歸來

信馬看雲日日晴歸來衣袂有餘清東華紅軟何  
須戀西嶺風光不可名夢裏還應尋谷口耳邊猶  
似聽泉聲明年桃杏花開節擬向青山續舊盟

橫雲山人集卷之十七終